

Inatsisartut aalajangiiffigisassaattut siunnersuut Naalakkersuisut peqquneqassasut, aalisarnerup iluani tunitsivinni tunisat tamaasa oqimaassutsinut akigitat ingerlaavartumik saqqummiunneqartalernissaat anguniarlugu internetsikkut portalimut pilersitsinissamik nalunaarusiamik 2018 ingerlanerani agguaassissasut. Nalunaarusiami nalilersuinerit, suliassat pilersitsinissamut tunngasut, naleqqussaajuarnissamullu aningaasartuutissat ilanngunneqassapput, portali qanoq aaqquissuunneqarsinnaanersoq – kiisalu inuussutissarsiummut tunngatillugu aningaasarsiornermut unammilleqatigiinnermullu qanoq kinguneqarsinnaanera ilaatinneqassallutik. (Inatsisartuni Ilaasortaq Henrik Fleischer, Partii Naleraq)

Akissuteqaat

(Aalisarnermut Piniarnermullu Naalakkersuisoq)

1. Siullermeerneqarnera

Inatsisartut aalajangiiffigisassaattut siunnersuut manna Inatsisartuni ilaasortap Henrik Fleischer, Parti Naleraq, saqqummiussaa Naalakkersuisut soqutigalugu suliarisimavaat.

Tunngaviummik suliniutinut aalisarnermik inuussutissarsiornermi ammanerulersitsisut paasiuminarnerulersitsisullu pillugit ataatsimut pitsaasut Naalakkersuisut nalilerpaat. Pitsaanerumik akit pisassiisutillu pillugit tamat paasissutissiiffiginerat unammilleqatigiinnernermut iluaqutaasinnaavoq, Nunatsinnilu aalisarnermik inuussutissarsiuteqarnerup pitsanngoriaatigisinnaallugu.

Naalakkersuisulli isumaqarput, tulaassanut akinut tunngatillugu paasiuminarnerulersitsinerunerit aalisarnermi inuussuteqartut peqataasut akornanni isumaqatigiissutaasut aallavigalugit pitsaanerpaamik qulakkeerneqarsinnaasut. Naalakkersuisuni taamaammat isumaqarpugut nassuiaammik suliaqartitsiniarneq nukinnik siunnerfiunngitsumik atuiffiunnasasooq.

Naalakkersuisut nassuiaammik suliaqarneq sulisumik AC-tut (ilinniagartuutut) sulisumut ukiumut ½ - 1-imik sulisitsinermik nalileqassasooq (DKK 275.000-550.000) nalilerpaat.

Siuliani taaneqartut tunngavigalugit aalajangiiffigisassatut siunnersuut akuerineqassanngitsoq inassutigineqarpoq.

Naalakkersuisut akerlianik inuussutissarsiortut saaffiginierpaat kalaallit aalisarneranni akit ilusaanni paasiuminarnerulersitsinissamut aaqquissutissat pillugit.